



Velike vrućine – pouke i poruke (Meka)

Hatib: dr. Bender ibn Abdulaziz Belile

21. safer 1447. po Hidžri / 15. august 2025.

Hvala Allahu, Koji je stvorio stvorenja, odredio sudbine, podijelio opskrbu i zapisao životne vijekove. Zahvaljujemo Mu, slavljen neka je On, stvorio je kosmos, učinio da rijeke teku, Zemlju učinio prostranom i razdvojio mora. Svjedočim da nema boga osim Allaha, Jedinog, Koji nema sudruga. On je potčinio Sunce i Mjesec, noć i dan, i svjedočim da je Muhammed, sallallahu alejhi ve sellem, Njegov rob i poslanik, izabranik i odabrani vjerovjesnik. Neka su salavat i selam na njega, na njegovu čistu porodicu, njegove čestite ashabe, kao i na one koji ih slijede u dobročinstvu, danju i noću.

O ljudi, savjetujem sebe i vas, da se bojimo Allaha!

Bojte se Allaha, Allah vam se smilovao, i znajte da se u ovom kosmosu ništa ne događa osim Allahovom odredbom i voljom, Njegovom mudrošću i željom. Noći i dani, vjetrovi i kiše, studeni i vrućine, promjene i ponavljanja – sve to navodi vjernika da bude uvjeren da ovaj svijet nije mjesto stalnog boravka. Sve su to kosmički znakovi koji ukazuju na veličinu Allahove moći i snage, širinu Njegovog znanja i mudrosti, suptilnost Njegove volje i milosti, i da je sve kod Njega određeno s mjerom, kao što kaže Uzvišeni: “U stvaranju nebesa i Zemlje i u izmjeni noći i dana su, zaista, znamenja za razumom obdarene, za one koji i stojeći i sjedeći i ležeći Allaha spominju i o stvaranju nebesa i Zemlje razmišljaju. ‘Gospodaru naš, Ti nisi ovo uzalud stvorio; hvaljen Ti budi i sačuvaj nas patnje u Vatri!’” (Ali Imran, 190–191)

O vjernici, ko od nas nije osjetio neugodnost zbog ljetne žege? Koga od nas nije zapahnula vreline sunca? Svi smo to doživjeli, manje ili više. To je ljetni vaiz, kojim Allah podsjeća Svoje robove na žegu Sudnjeg dana i kaznu Vatre. Mikdad ibn Esved, radijallahu anhu, rekao je: “Čuo sam Allahovog Poslanika, sallallahu alejhi ve sellem,





kako kaže: 'Sunce će se približiti stvorenjima na Sudnjem danu na udaljenost od jednog 'mila'. Ljudi će tada biti u znoju prema svojim djelima: neko će biti u znoju do članaka, neko do koljena, neko do bokova, a nekoga će znoj potpuno prekriti.'" Sulejm ibn Amir rekao je: "Tako mi Allaha, ne znam da li je rječju 'mil' mislio na razdaljinu od jedne milje ili na štapić kojim se surmom mažu oči." (Muslim)

O muslimani, žestoka vrućina jedan je od znakova koje Allah šalje Svojim robovima, kao upozorenje, podsjetnik, pouku i opomenu. Uzvišeni kaže: "A čuda šaljemo samo da zastrašimo." (El-Isra, 59)

Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Vatra se požalila svome Gospodaru govoreći: 'Gospodaru moj, jedan dio mene izjeda drugi!', pa joj je Allah dozvolio dva oduška: jedan zimi, a drugi ljeti. To je ono što osjećate kao najveću vrućinu i najveću hladnoću." (Muttefekun alejhi)

O vjernici, sretan je onaj koji, od ovoidunjalucke žege, uzme poputninu za žegu ahireta, i onaj koji ustraje u ibadetu u najtoplijim danima, kako bi uživao u vječnom užitku na Dan kada će tajne biti razotkrivene. Uzvišeni kaže: "O vi koji vjerujete, sebe i porodice svoje čuvajte od vatre čije će gorivo ljudi i kamenje biti, i o kojoj će se meleki strogi i snažni brinuti, koji se onome što im Allah zapovjedi neće opirati, i koji će ono što im se naredi izvršiti." (Et-Tahrim, 6)

Ebu Seid el-Hudri, radijallahu anhu, rekao je: "Čuo sam Allahovog Poslanika, sallallahu alejhi ve sellem, kako kaže: 'Ko posti jedan dan na Allahovom putu, Allah će njegovo lice udaljiti od Vatre sedamdeset godina.'" (Muttefekun alejhi)

A Ebu Derda, radijallahu anhu, govorio je: "Postite dan kada je žega najjača, zbog žestine Dana proživljenja, i klanjajte dva rekata u tami noći, zbog tame kabura." (Ebu Nuajm, El-Hil'ja)

Znajte, Allah vam se smilovao, da sve teškoće i patnje, naponi i iscrpljenosti koji zadese vjernika – sve je to sačuvano, zapisano, zabilježeno i vrednovano kod Onoga kod Koga se dobra djela ne gube i ne zaboravljaju. Time se brišu grijesi, umnogostručavaju dobra djela i povećavaju stepeni. Ebu Seid i Ebu Hurejra,





radijallahu anhumu, prenose da je Allahov Poslanik, sallallahu alejhi ve sellem, rekao: "Vjernika ne zadesi ni teškoća, ni umor, ni bolest, ni tuga, pa čak ni briga koja ga obuzme, a da mu Allah time ne obriše dio grijeha." (Muslim)

Nagrada za djela uvećava se i djela postaju teža na mizanu (vagi) ovisno o nijetu, iskrenosti, strpljenju i ustrajnosti onih koji ih čine. Ibn Esir, Allah mu se smilovao, rekao je: "Očekivanje nagrade za dobra djela i podnošenje nevolja znači žurno traženje sevapa kroz predanost i strpljenje."

Od Allahove milosti prema Njegovim robovima jeste i to što im je propisao djela koja su u njihovoj moći, i nije ih opteretio onim što im je teško. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Kada se poveća žega, odgodite namaz dok ne zahladi, jer je velika žega odušak Džehennema." (Muttefekun alejhi)

"Odgađanje namaza dok ne zahladi" znači njegovo odgađanje zadnjeg dijela namaskog vremena, kada se žega smanji, ali prije nego što nastupi sljedeći namaz. Na isti način može se postupiti i s drugim ibadetima koje je dozvoljeno odgoditi, kao što je napaštanje propuštenih dana ramazana, ili iskupni post, njih je dozvoljeno odgoditi za hladnije dane, ako ih je teško postiti po vrućini. Na to ukazuje i hadis Aiše, radijallahu anha, koja je rekla: "Imala sam obavezu napostiti neke dane ramazana, i nisam ih mogla napostiti prije mjeseca šabana." (Muttefekun alejhi)

Ipak, požurivanje je bolje.

O vjernici, zahvaljujte Allahu u svim okolnostima i stanjima, i zahvaljujte Mu na sredstvima i uzrocima koje vam je dao, hladovinama, rashladnim uređajima i ljetovalištima, koji vam ublažavaju tegobe i žestinu vrućine.

Brinite se za svoju braću siromašne i potrebne, ublažite im žestinu vrućine, koju osjećaju, svako prema svojoj mogućnosti. Među tim djelima je i davanje hladne vode u ovim vrelinama, što je jedna od najboljih vrsta sadake, kako je to rekao Allahov Poslanik, sallallahu alejhi ve sellem.





Sjetite se svoje braće u vjeri, koju je, pored vrućine, zadesila i bol gubitka najmilijih, kao i gubitak imetka, života i plodova.

Allahu, ukloni od njih ono što ih je zadesilo.

Allahu, zamijeni njihov strah sigurnošću, tugu radošću, glad sitošću. Pomozi ih protiv Tvog i njihovog neprijatelja, o Silni i Moćni.

Znajte, Allah vam se smilovao, da negodovanje i nestrpljivost zbog velike vrućine predstavlja protivljenje Allahovoj odredbi i sudbini, Njegovoj volji i želji. Sve što se dešava u ovom svemiru ima svoju mudrost, korist, svrhu i dobrobit. Zato se bojte Allaha, Allahovi robovi, i čuvajte svoja srca i jezike od onoga što umanjuje vaš iman i narušava vaš tevhid (vjerovanje u jednog Boga), koji nije moguće postići bez zadovoljstva i pokornosti Allahovim šerijatskim propisima i Njegovim kosmičkim zakonima.

Zatim, donosite salavat i selam na najboljeg od Allahovih stvorenja, Muhammeda, sina Abdullahovog, jer vam je to naredio vaš Gospodar, Uzvišeni, kada je rekao: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

